

[Augsburg], 9. April 1575

An Henri Estienne

Staats- und Universitätsbibliothek Bremen, Ms. a. 8, Nr. 415 (msa 0008/415).

S. Scribis, me, cum Herbardi libellis, Thesaurum Latinae linguae accepturum. Sed Herbardo tristiss[imum] librorum tuorum naufragium significas: quod equidem tua causa quam mea tantò magis doleo, quantò de grauiorem fecisse iacturam, probabile est. Sed ita fert mortalitatis nostrae conditio, et fortunae varietas: ut tristia laetis, et haec illis succedant: qua spe etiam, non animi constantia tantùm, sapienter sanè atque fortiter te sustentas. Laudo etiam institutum tuum recudendi τοὺς δέκα λεγομένους ρήτορας. In quo equidem opere studium adiuuari tuum mea quoque opera posse peruelim. Nam et tuis commodis et rei literariae ex animo consultum cupio: praetereaquæ honorificum mihi ducerem, è Phidiaca tua officina meum meum aliquid prodire. Sed me, proh dolor, morbida senectus ita debilitauit, ita eneruauit: ut, quod superiorib[us] annis uno atque altero mense confeci, nunc ne toto quidem biennio, inter tot et tam crebros morborum cruciatus, polliceri ausim. Itaque necesse mihi est, autorem Fabium secuto, desinere potius quam deficere. Caeterum hortator fui Vilhelmo Cantero (quem nunc Louanij docere arbitror) iuueni doctiss[imo], ut reliquos rhetoras conuerteret: qui tum dicebat, se mendis codicis ab eo conatu deterrerri: quae me sanè, si adhuc integris viribus essem, non magnopere mouerent, et usu graecæ linguae mediocri, et τῷ στοχαστικῷ τῆς διάνοιας fretum. Tu verò, vir clariss[ime], et de graecis latinisq[ue] literis praeclarè merite: perge feliciter Graecos autores partim ἀνεκδότους proferre in lucem, partim nullo nunc aere parabiles, restituere: nisi forte et magnitudine sumptuum, et, in his bellorum furoribus, tarditate distractionis, ab honestiss[imo] conatu deterreris. In quo meum non est quicquam praescribere tuae prudentiae. Vale. 5. idus Aprilis 1575.

Hiero[nymus] Wolfius  
Tuus.